



UN VISITA IN LE BURSA DE BIRA IN BERLIN

Le narrator: *Benvenite a Berlin, le capital de Germania e un urbe con un historia extraordinari. E anque in multe altere maneras Berlin es extraordinari. Inter altere cosa, le precios es minus alte que in altere capitales, e le touristas pote gauder de un longe saison con calor agradabile, durante que illes explora le urbe que revela multe curiositates.*

Paulo: Hm, il es septe minutas ante octo horas. Io spera que Anna e Petro venira in tempore. Io ha reservate un tabula pro nos in un restaurante vermente special. Io non ha experienciate qualcosa simile jammais.

Anna: Salute, Paulo!

Paulo: Anna e Petro, salute!

Petro: Como isto es un bellissime loco a incontrar nos. Io es curiose de saper a ubi nos vadera.

Anna: Ma iste loco es charmante – justo proxime al fluvio Spree que crucia a transverso de Berlin.

Petro: Si, e le vespere es equalmente phantastic. 20 grados ancora – in septembre. Nulle meravilia que le cafés es plen de gente qui sede al exterior.

Anna: Ha tu reservate un tabula pro nos ci con un vista belle al fluvio, Paulo?

Paulo: No, de facto non...

Anna: Oh, proque non? Debe nos vermente seder al interior?

Paulo: Si, ma non despera! Io ha trovate un loco toto exceptional, e il ha un ration multo bon proque on non pote seder al exterior. Nam alora on non pote sequer le cursos de cambio...

Petro: Cursos de cambio?? Debe nos mangiar in un banca???

Paulo: No, non exactemente. Ma tu ha un poco ration totevia...

Anna: Isto sona vermente mysteriose: mangiar vidente le cursos de cambio de moneta.



Paulo: No, io non diceva cursos de moneta. Il es multo melior: Il se tracta de cursos de bira.

Anna e Petro: DE BIRA???

Paulo: Si, de bira. Veni con me. Nos debe solamente vader poc metros de ci pro entrar.

Anna: Isto deveni sempre plus estranie. Ma si nos quasi es al restaurante, io crede que mi curiositate pote attender un poco.

Paulo: Ecce illo!

Petro: “Die Berliner Republik” – Le Republica Berlinese. Es isto le loco?

Paulo: Si, lege le altere signo.

Anna: Ubi...? Ah, ecce illo: “Bierbörse” – le Bursa de Biras. Ma que es isto?

Paulo: Vos videra. Entra, per favor!

Anna e Petro: Gratias!

Narrator: *Le tres amicos entra in le restaurante, e le servitor les placia a un longe tabula de ligno.*

Paulo: On mangia ben ci, io ha legite in le recensioni. Ma le majoritate del gente veni ci pro altere rationes: pro esser parte del Bursa de Biras.

Petro: E ora io crede que tu nos debe un explication. Que es isto?

Paulo: Reguarda sur le muro la.

Anna: Un schermo? E que dice illo? Es isto le precios?

Petro: Illo pare exactamente como le schermos que on vide in le bursa in le television.

Paulo: E illo es de facto le mesme systema, ma in vice de moneta o acciones iste bursa tracta de biras. In le prime columna vos vide le nomines de omne le biras que on pote comprar in le bar. Il ha 18 in total – omnes, naturalmente, es de origine german. Le columnas parallel es le precio actual de cata bira, le precio minimal del periodo e le precio maximal del periodo.

Anna: Como in un ver bursa!

Paulo: Si. Le precios reflecte le interesse de comprar un certe bira. Si nemo desira comprar iste bira, le precio va cader. Si multes vole biber iste bira, le precio va augmentar, e on debe allora curre al bar pro comprar su vitro – o vitros – ante que le precio augmenta ancora plus.

Petro: O curre al bar pro comprar le bira non-interessante durante que le precio es basse.

Paulo: Exactemente, proque on risca que si le cauda es troppo longe, allora le precio va augmentar intertanto.

Anna: Ha ha, isto es amusante – e genial. Allora on probabilemente va gustar biras differente que on non haberea seligite alteremente.

Paulo: Si, e isto non es toto. Nam a vices – subito e sin ulle signo in avantia – il ha un crac, un cadita del bursa. Allora tote le cursos del bursa, isto es le precios del biras, cade a zero. E allora on vermente

Produkte	Preis	Änw.	h	Max.	Min.
König Pilsner 0,3	2.30			2.30	3.20
Diebels Ait 0,3	2.40	0.20	9.09	2.20	2.70
Kostritzer 0,3	2.50	0.20	8.70	2.30	2.70
Bilburger 0,3	2.70	0.20	8.00	2.30	2.70
Radlauer Biß 0,3	2.90	-0.20	-6.45	2.60	3.20
Potsdamer Rex 0,3	3.40	-0.20	-5.66	2.10	3.60
Kölsch 0,3	2.70	-0.20	-6.90	2.30	3.10
Schiffbauer Pils 0,5	3.20	-0.10	-3.03	3.20	3.80

debe curre al bar pro comprar, ante que le precios de novo augmenta secundo le interesse pro le singule bira.

Petro: Phantastic, qual idea! Io te pardona pro seder al interior! Vamos directemente al bar. Le bira Kolsch es a bon mercato ora, io vide..!

Anna: Ma, Petro, nos non solmente pote biber bira. Nos debe anque mangiar. Que desira tu?

Petro: Il non importa. Vos pote seliger pro me. Oh, le precio ha cadite ulteriormente. A revider in un momento..!

Paulo: Ha, ille ha trovate le bon spirito – e le bon bira.

Anna: Ha ha, un bon joco de parolas. Io vide que on mangia un impresionante wienerschnitzel al tabula vicin. Io amarea anque haber un tal. Isto es bon con bira.

Paulo: De accordo. Nos va ordinar tres wienersch.... Guai, un crac! Al bar – IMMEDIATEMENTE..!



UN VISITA IN LE BURSA DE BIRA IN BERLIN


1 Associa cata parola con un expression o un synonymo.

- | | | | | |
|-----|--------------------------|------------|----|--|
| 1. | <input type="checkbox"/> | cruciar | A. | un surprisa que on non pote comprender |
| 2. | <input type="checkbox"/> | bursa | B. | le loco del qual veni un cosa o persona |
| 3. | <input type="checkbox"/> | origine | C. | le situation quando toto subito ha nulle valor |
| 4. | <input type="checkbox"/> | fluvio | D. | como un enigma, incomprendibile |
| 5. | <input type="checkbox"/> | merabilia | E. | esser sin spero |
| 6. | <input type="checkbox"/> | recension | F. | secar un area in duo partes |
| 7. | <input type="checkbox"/> | crac | G. | un riviera |
| 8. | <input type="checkbox"/> | desperar | H. | jectar retro |
| 9. | <input type="checkbox"/> | reflecter | I. | un loco pro commercios con p.ex. valuta |
| 10. | <input type="checkbox"/> | mysteriose | J. | un iudicamento de p.ex. un libro in un jornal |

2 Lege le texto de novo, e responde, si le phrases es ver (V) o false (F).

- | | V | F |
|---|--------------------------|--------------------------|
| 1. Un crac significa que le precios augmenta al maximo. | <input type="checkbox"/> | <input type="checkbox"/> |
| 2. Le vespere es calide, proque il es estate. | <input type="checkbox"/> | <input type="checkbox"/> |
| 3. In le prime columna del schermo on vide le nomine del biras. | <input type="checkbox"/> | <input type="checkbox"/> |
| 4. On debe currer al bar ante que le precios cresce de novo. | <input type="checkbox"/> | <input type="checkbox"/> |
| 5. Il es Petro, qui ha reservate le tabula pro le tres amicos. | <input type="checkbox"/> | <input type="checkbox"/> |

3 Augmenta tu vocabulario: Combina le designos e le parolas sub le cassa.



vino rubie • salsicias • servitrice • vino blanc • lattas de bira • salute! • bottilia e uvas